

1 पत्र पत्र रासता मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पत्र

रासता कालम: इसवि सन 65-67

रोम राज्येमते वें-वें एरियाने पैलांचि, पराय देसेमतोरालेसी मत्ता विस्वासुल्कुनाहाटी पत्र इद सिट्टि रासतोर. ओर सामिना लोप्पो विस्वासमते गट्टिगा मत्ताहाटीं लोकुल्कुनहेंदाल ओर्क वेल्ले तकलिपकु मत्तां, ओर दुक्कमते मत्तुर.

अदुनहाटीं पत्र ओर्क दैरनेम हीसेक मंतोर. बोर अयते तकलिपकुन, दुक्कमतुन ओप्के पीसि ओर्सकुंचेके विस्वासमते गट्टिगा मनंतुर, ओरापोर्री पेनदा दया बस्केळक मनंता. आनि सामि येसु किरिस्तु मल्सि वातस्के दाना पलम ओर्क दोर्कता, इंचि इद सिट्टिते रासतोर.

बगा बतल मंता

जोहार आनि परिचयम 1:1-2

पेनदा मुक्किता बारेमते मति कीसि हियमळ 1:3-12

पवित्र पिस्वर पिस्सनाहाटी बोदा 1:13-2:10

तिप्पल्क वातास्के विस्वासुल्कुना जिम्मेदारिना बारेमते पोल्लें 2:11-4:19

गरा हिलाकोटा मनमळ आनि पेनदा सेवा कियमळ 5:1-11

आकिरता बोदां 5:12-14

पत्र विस्वासुल्कुंक जोहार कीतोर

1 नना पत्रुन, येसु किरिस्तुना प्रेरितुन आंदुन. रोम देसेमता पुंतुस, गलातिया, कप्पुदुकिया, आसिया आनि बिनुनिया राज्येल्कुने पैलांचि होंचि, पराय देसेमतोर आसि मत्ता लोकुल्कुंक नना इद सिट्टि रासेके मंतन.

2 पेनबाबाल मीकुन मुन्नेन पेरसि निलाहतोर. अदुनहाटीगे, मिमेट येसु किरिस्तु वेहताप ताकगोम, ओना पोंगता नेत्तुरते मीवा पापाल्क पायसि होनगोम इंचि पवित्र आत्माताहेंदाल मीकुन पवित्र कीतोर. पेनदा कुर्पा, सांति मीक इरगा दोर्किकांटी.

बस्केळक पिस्साना आसे

3 मना सामि येसु किरिस्तुना पेनबाबाना दन्यवाद आयि! ओना वेल्ले दयाताहेंदाल मनाकुन पूना रीतुने पुटिचमळ जर्गता. अद बल्हा इत्ते, पेनबाबाल येसु सामिन हातोरा लोप्पोटाल मर्ग तेहाचि, मनाकु उंदि पिस्वरता आसे हीतोर.

4 इंका अद बस्केने नासडेम आयवद, तप्पु हिलवद आनि कर्गुवसोंटा वारसान हक्क स्वर्गमते मीवाहाटीं ईसिं मंता.

5 आकिरि रोजकुने पेन अंटोर्कुंक हृप्सालय तयार कीसि इरता मुक्ति, मीकु दोर्कनाहाटीं मीवा विस्वासम परकारम पेन मीकुन दाना बलमते कापाळसि स्वर्गमते इरसंता.

6 अदुनहाटीं मिमेट इरगा कूस आम्टु. इंदके मीक गडसेमताहाटीं बच्चुंगो तीरकुना परिकसां सहन किया पीता.

7 नासडेम आयाना बंगारमतुन तळमिते करगागोटसि परिकसा कीतुर. गानि आ बंगारमकन्ना बच्चोरो विलुवाता मीवा विस्वासमतुनगुडा परिकसा एतमळ जर्गता. येसु किरिस्तु मर्ग वातस्के, मीकुन मेचकुंचि पेद्दातनम आनि कदर दोर्काना कारनम आयगोम्.

8 मिमेट येसुन हळाकोन्ना गानि पावरम कीतिट; इंदके ओर दिसाकोन्ना ओन विस्वासम कीसि, पोल्लेने वेहा परवच्चोन आनंदमते आनि महिमाते निडिस मंतिर.

9 इल्हा मीवा विस्वासमता पलम इंचि मिमेट मीवा आत्मांकु मुक्ति दोर्किचेके मंतिट.

10 मीक दोर्कना मत्ता कुर्पाता बारेमते बोर पेनदा कबुरतोर अय्ते बविस्ववानि कीसि मत्तोर, ओर इदे मुक्तिता बारेमते पूसकीसेके, पहकसेक मत्तुर.

11 किरिस्तु बल्हा तकलिप वासि हायनुर, दाना पजा बल्हा ओनकु स्वर्गमते कदर दोर्कार इंचि ओरा लोप्पो मनना किरिस्तुना आत्मा मुन्नेन वेहचि मत्ता. गानि इव पोल्लें बोना बारेमते, बस्के आयनुं इंचि पेनदा कबुरतोर पहकुंदुर.

12 इव पोल्लें ओरा पायदाताहाटीं आयों गानि मीवाहाटीं इंचि पेने ओर्क तेळियागोटिस वेहचि हुपिस्ता. इदवेरादाका बदाय्ते बेसता कबुर वेहतुर, अद स्वर्गमताल लोहचीता पवित्र आत्माहेंदाले मीक वेहतुर. इव पोल्लेना बारेमते पेनदा दूतांगुडा बल्हा आंतानो इंचि हळना इच्चाते मंतां.

पवित्र आम्टु

13 अदुनहाटीं मिमेट बेसता बुद्दिदतोनि, हुसारते मंटु. येसु किरिस्तु मर्ग मल्सि वातस्के मीक दोर्कना कुर्पाताहाटीं पूरा आसेते मंटु.

14 येसु किरिस्तुना बारेमते मीक तेळियवस्के मीलोप्पो मत्ता कराब अलवटकुना जोलिक होनाकोंटा, पोल्ले वेहते केंजाना पिलाल्कुनालेसीं मंटु.

15 गानि बद पेन अय्ते मीकुन केयता, अद पवित्र मंता. अल्हेने मिमेटगुडा मीवा ताकमळते अन्नि तीरकुने पवित्र मंटु.

16 बारित्ते दर्मसास्त्रमते, “नना पवित्र मंतन इंचि मिमेटगुडा पवित्र आम्टु,” इल्हा पेन इंता.

17 हरेक मनकन सिन्ना-पेद्दा इनाकोंटा ओरा कबाह्कुन ह्ळसि न्यायम कियाना पेनदुन मिमेटगिंटा “बाबा” इंचि पारतना कीते, दुनियाते मतच्चोरजेम परायतोरम इंचि वेंरेंते ताकाटु.

18-19 मीवा तादो-बाबुरागटाल ताकसेके वाता एर्तम पिस्वरतुन, नासडेम आयाना एंडि-बंगारम इळबळिचा हिल्ले, गानि दोसेम हिल्वद, मर्का हिल्वद गोंरें पोरिनसोंटा किरिस्तुना विलुवाता नेत्तुरताहेंदाल मिमेट इळबळतिर, इदु मीकु एरपाटे मंता.

20 दुनिया पुट्टका मुन्नेन किरिस्तुन पेन पेरता, गानि मीवाहाटीं इव आकिर रोजकुने ई दुनियाते वातोर.

21 ओनहेंदाल मिमेट पेनदापोरें बरोसा कीतिर. पेन ओन हातोरा लोप्पोटाल मरी जीवाते तेहाचि, ओन्क पेद्दातनम हीता. अदुनहाटीं मीवा आसे आनि विस्वासम पेनदापोरें मंता.

22 मिमेट सत्तेमता हरिं ताकसि मीवा आत्मातुन पवित्र कीकुत्तिर. अदुनहाटीं मिमेट वरोंक-वरोर पावरम कीसेके मंतिट. अल्हेने इंदके मीलेसीं विस्वासुल्क आतोरकुन मिमेट पूरा मनसुनाल पावरम कीम्टु.

23 इंदके मिमेट पूना पिस्वरते पुटतिर, नासडेम आयाना पेडेहेंदाल आयो, गानि बस्केन नासडेम आयवद, बस्केळ्ळ जीवाते मनना पेनदा पोल्लेताहेंदाल, पूना पिस्वरते पुटतिर.

24-25 दर्मसास्त्रम इल्हा वेहंता गदा,
“अंटोर मनकालोर जाडितालेसीं मंतुर,
ओरा अन्नि पेद्दातनाल्क पुंगाह्कुनालेसीं मंतां.

जाडि वतंता, पुंगाह्कु रालंतां.

गानि सामिना पोल्ले मात्रम पीळि-पीळिनदाका मनंता.” ☆
इदुने मीक बेसता कबुर इंचि वेहमळ जर्गता.

2

पेनदा लोकुल्क इत्ते जीवाते मनना बंडानसंतोर

1 पेन बच्चोर दया कियानद आंद इंचि मिमेट अय्ते एरपाट कीतिट. अदुनहाटीं अग्नि तीरकुना तप्पु कबाहक, अग्नि तीरकुना बोंकिचमळ, नडेह कियमळ, कळक पोतमळ, अग्नि तीरकुना अपमानम कियमळ इवुन होळसीम्टु.

2-3 इंदके पुटता पसिबाला बल्हा पाल उन्नालय तनलाळंता, अल्हेने मिमेटगुडा बेसता पाललेसीं मनना पेनदा पोल्लेताहाटीं तनलाळट. अल्हा तनलाळते मिमेट मुक्तिहाटीं पेनदा पोल्ले परकारम बेरस्सेक दांतिट.

4 मिमेट जीवाते मंदना बंडातसोंटा किरिस्तुनगा वट, मनकालोर्क ओन हय्सा हिल्लुर गानि ओर पेनदा लोप्पो पेरकुत्तोर आनि विलुवातोर आंदुर.

5 मिमेटगुडा जीवाते मंदना बंडानलेसीं पवित्र आत्माता लोन दोहचेक मंतिट. येसु किरिस्तुनाहेंदाल पवित्र आत्माता बक्तिंतुन मोक्कु हीताप पेनदुक ओप्पनालायक मनालय, मिमेट पवित्र पेर्मांलोर्लेसीं निलाहतुर आंदिर.

6 बारित्ते दर्मसास्त्रमते पेन इल्हा इत्ता गदा:

“नना सियोनते सेंकुमूला बंडतसंतोन वरोन इरसेक मंतन,
ओन नना पेरतन, ओर वेल्ले विलुवातोर आंदुर.

ओनापोर्गे बोर अय्ते विस्वासम ईरंतोर, ओर बस्केने सिग्गुना पाल आयोर.”✧

7 अदुनहाटीं मिमेट विस्वासम कीतिर इंचि अद बंडा मीक विलुवातद, गानि बोर अय्ते अदुन विस्वासम किय्युर, ओराहाटीं दर्मसास्त्रम इल्हा वेहता गदा:

“बद बंडातुन दोहानोर बतक ओज्जो इत्तुर,

अदे बंडा इंदके सेंकु मूलाता मोदोल बंडा आता.”✧

8 इंका दर्मसास्त्रमते इल्हा मंता गदा,

“अद बंडा लोकुल्कुंक दल्गंता, इंका पर्पु बंडा ओर्कुन हिळु अरहंता.”✧

बारित्ते, ओर पेनदा पोल्लेने ताकवाहेंके, बंडा दल्गिसि हिळु अरंतुर.

ओर हिळु अरंनाहाटींगे इल्हा निलाहमळ जर्गता.”

9 गानि मिमेट अय्ते पेन पेरकुत्ता वंसमतोर, राज्लुकुनसोंटा पेर्मांलोर्क, पवित्र राज्यमतोर, पेनदा लोकुल्क आंदिर. अदुनहाटीं मिमेट दाना अद्बूतामाता कबाहकुन वेहाना इंचि मीकुन हीकटताल अद्बूतामाता वेल्लुने तत्ता.

10 मुन्ने मिमेट पेनदा लोकुल्कगुडा मना हिल्लिर, गानि इंदके मिमेट पेनदा लोकुल्क आतिर. मुन्ने मीपोर्रो पेनदा दया मनाहिल्ले, गानि इंदके मीवापोर्रो पेनदा दया मंता.

11 नावा पावरमगल्लोरिता, मिमेट वेंरे देसेमतोर, वेंरे नाटेनोर आसि मंतिर. अदुनहाटी मी आत्माकु अड्डम मनानव दुनियातां अग्नि सेड्डा आसेनाल लक्कु मंटु इंचि विनंति कीसेके मंतन.

12 मिमेट अविस्वासुल्कुना नड्डुम मंतिट इंचि बेस ताकट. ओर मीकुन कराब लोकुल्क इंचि बदनाम किथ्यिनागानि मीवा बेस कबाह्कुन हळसि, पेन वायाना रोजुने ओर इंका पेनदा कदर कियानुर.

अदिकारम मत्तोरुंका पोल्लें कैजना

13-14 मिमेट सामिनाहाटी दुनियाते मनना अदिकारिल्कुना कयदा हिळु मंटु. राजाल पेद्दोड इंचि ओना कयदा हिळु मंटु. अदिकारिल्कुना पोल्ले कैजाट, बारित्ते बेसता कबळ कियानोरुंक मेच्चुनालय आनि कराब कियानोरुंक सिक्सा हियालय ओर्कुन लोहमळ जर्गता.

15 बारित्ते, मीवां बेसता कबाह्कुन हळसि, तेल्वि तक्को लोकुल्कुना तोड्डि बंद कियाना इंचि पेनदा इच्छा मंता.

16 मिमेट बोना कयदा हिळु हिल्लाप मना परांतिट गानि “बोना कयदा हिळु हिल्लोम” इंचि मीवा मनसुंक वाताप कराब कबाह्कुने ताकमट, पेनदा सेवाकुल्कुनलेसी ताकट.

17 अंतोरा कदर कियाना, मना दंतता विस्वासुल्कुन पावरम कियाना. पेनदुक वेरियसि ताकना, राजाना कदर ईराना.

18 जीतागाह्कुनिटा, मिमेट मीवा मालकुंक पूरा कदर हीसेक ओरा कयदा हिळु मंटु. सिराप बेसता गुनम, सादा सिंपल मत्तोरहेकेन आयो गानि कडक मनना मालकुनगा गुडा ओर वेहताप ताकट.

19 बारित्ते बोरें आयिर पेनदा लोप्पो ताकानेंके तप्पु हिलाकोन्ना गानि देब्बां तिन्निना, तिप्पल्क वायिना, ओप्के पीसि मनानय्ते अद मेच्चुनना पोल्ले आंद.

20 निमे तप्पु कीसि देब्बां तित्तिन, ओप्के पीसि मत्तिन, अय्ते अव्ते नीकु बता पायदा वाता? गानि निमे ओक्कला बेसता कबाह्क कीसि देब्बां तिचि ओप्के पीसि मनानय्ते, पेनदुक नच्चानोन आंदिन.

21 इदुनहाटींगे मीकुन पेन केयता आनि किरिस्तु मीवाहाटीं तकलिप अरतोर, मिमेट इंका ओना अळगुने अळगु वाटसि ओना पज्जो तकलिप अर्सि ताकना इंचि उंदि उदाहरनलेसीं पेन मीकुन निलाहता.

22 ओर बतले पापम किया हिल्लोर, ओना तोळदाल बस्केने बोंकिच्चना पोल्ले पेयसा हिल्ले.✧

23 ओन तेरहिना गानि दानकु बदुल ओर बोने तेरहा हिल्लोर. ओन बच्चोनो तकलिप कीतुर गानि दानकु बदुल ओर बोर्कुने बेदरिचा हिल्लोर, दानकु बदुल सत्तेमते न्यायम कियाना पेनदुक ओनद-ओर अप्पजेपतोर.

24 मनम पापालकुनाहाटीं हासि होंचि सत्तेमताहाटीं पिसागोम इंचि येसु ओना मेंदुल्लुन कूस पोर्री हीतोर. ओर तित्ता देब्बाना हेंदाल मना बिमार्क बेस आतां.

25 मुन्ने मिमेट हर्रि तप्ता गोंरिनलेसीं तिरियसेक मत्तिर. गानि इंदके मीवा जीवातुन कापाळसि कोहानोनगा मल्सि वातिर.

3

मुत्तो-मुय्दोना ताकमळ

1-2 अल्हेने मुत्तोहकुनिटा, मिमेट मीवा मुय्दुरा कयदा हिळु वेंरेंते मंटु. ओक्कला ओर पेनदा पोल्लेते ताकाकोंटे, पोल्लेनतोन आयाकोन्ना मीवा पवित्र आनि सत्तेमते ताकानदुन हळसि विस्वासमते वायानुर.

3 मीवा केल्लुकुन तीराता जेडां वाटमळ, बंगारमता नगां केरमळ, एक्को दराता कपळिं पोंडमळ इसोंटा पलाताल दिस्सना सिंगारम कियमट.

4 गानि दानकु बदुल मीवा मनसुना गुनम सादा-सिंपल, नासडेम आयवा सांत आत्माते सिंगारम कीम्टु. इसोंटद पेनदा मुन्ने बच्चोनो विलुवातद आंद.

5 एनकटा कालमते पेनदापोर्री आसे इर्ना पवित्रमाता मुर्ताहक बेसता गुनमते सिंगारिचुंदुं आनि मुय्दोना पोल्लेते ताकुंदुं.

6 बल्हा अय्ते अब्राहामुना मुत्तो साराल ओन मालक इंचि केयुंदु, ओर वेहताप ताकुंदु, अल्हेने मिमेटगुडा बेसता कबाहक कीसेके बदे पोल्लेक वेरियाकोंटा मत्ते, दाना मियाहक आंतिर.

7 अल्हेने मुय्दुर्कुनिटा! मीवा मुत्तोहकुंकगुडा मी अचोने पेनदा कुर्पाता वारसान हक्क मंता. गानि अवुंक मीलेसीं ताकत हिल्ले. अदुनहाटीं मिमेट मुत्तोहकुंक बेस कदर हीसि पिस्सट. अस्के मीवा पारतनाकु बतले अड्डम वायो.

येसुनाहाटीं तकलिप अर्ना

8 आकिरते, मिमेट उंदि मनसुने वरोंक-वरोर पावरम कियमळते, उंदि लोतोरलेसीं जीवा कियमळते, इंकावरोनहाटीं जीवा नोयमळते, सादा-सिंपल मनमळते अंटोर उंदि आसि मंटु.

9 कराबता बदला कराबतोनि एतमट; तेराहतोर इंचि तेराहमट गानि ओर्क आसिर्वाद हीम्टु. बारित्ते मीक आसिर्वाद दोर्काना इंचि पेन मीकुन केयता.

10 दर्मसास्त्रम वेहाताप,

“बोर अय्ते पिस्वरतुन मेचकुंचि, बेसता रोजकु हळंतन इंतोर,

ओर ओना नाल्केताल कराब पोल्लें,

ओना पेद्विनाल आबद्दम पोल्लें वळकमळ आपापीता.

11 ओर कराब कबाहकुन होळसिसि बेसता कबाहक कियाना, ओर सांतितुन पहकिसि दान पीसि ताकाना.

12 बारित्ते सामिना नदर नीतिमंतुल्कुना पोर्रो मंन्ता, ओरा पारतनातुन केव हीसि केंजंतोर, गानि दुस्टुल्कुंक सामि विरोद कीतोर.”☆

13 ओक्कला मिमेट बेस कियानाहाटीगे जोसने मत्ते, मीकुन बोर हेळाहनुर?

14 ओक्कला मिमेटगिंटा नीति कबाहक कियानेके मीक कस्टाल्क वायिना, पेन मीक आसिर्वाद हिय्यार. ओर वेराहते मिमेट वेरियमट, परेसान आयमट.

15 गानि मीवा मनसुने किरिस्तु मावा सामि इंचि ओनकु कदर हीम्टु. येसुना पोर्रोटा मीवा आसेता बारेमते बोरन्ना मीकुन पूसकीते, मिमेट सादा-सिंपल आनि मान-मर्यादाते बस्केळक वेहालय तयार मंटु.

16 गानि मिमेट किरिस्तुना लोप्पो बेस पिसमळतुन हळसि बोर अय्ते मीवा अपमानम कीतुर, असंटोर्क मीवा ताकमळतुन हळसि सिग्गु वायानाल मीवा विवेक बुद्धितुन बेस ईर्शि ताकट.

17 ओक्कला बेसता कबाहक कीताहाटीगे तकलिप बोगांचमळ पेनदा इच्चा मत्ते, कराब कबाहक कीसि तकलिप बोगांचना दानकन्ना, इदे बेस.

18 बारित्ते अंतोरा पापाल्कुनाहाटीं किरिस्तु उंदे मल्का हातोर. मनाकुन पेनदागा ओयालय वरोर नीतिमंतुड अनीतिमंतुनाहाटीं हातोर. मेंदुलताल ओन हव्कतुर गानि आत्माते ओन जीवाते तेहमळ जर्गता.

19 ओर हातोरा आत्मानगा होंचि, दोहचि वाटताप मत्ता आत्मांकु पेनदा कबुर वेहतोर.

20 एनकटा नोहाना कालमते डोंगा तयार कियानेके लोकुल्क वायानुर इंचि पेन ओण्के पीसि एदुर हळसेक मत्ता, गानि लोकुल्क पेनदा पोल्ले केंजा हिल्लुर. सिराप एनमिदि लोकुल्क पेनदुन नम्मिसि आ कम्मुळता एताल पिस्तुर.

21 आ एताल पिस्ता आनवल इत्तेने बापतिस्मा आंद. बापतिस्मा एतमळ इत्ते मेंदुलता मुर्कि होनालय आयो गानि येसु किरिस्तु हासि मर्ग जीवाते तेदताहेंदाल मनाकुन पिसागोटसि, विवेक बुद्धिताहाटीं पेनदुन विनंति कियाना करार आंद.

22 इंदके येसु किरिस्तु स्वर्गमते होंचि पेनबाबाना तिना बाजुंक उद्दतोर. अगा पेनदा दूतां, अदिकाराल्क, सक्तिं ओना कय हिळु मंतां.

4

विस्वासुल्कुना मनमळ

1 बल्हा अय्ते किरिस्तु मेंदुल्ते मत्तस्के तकलिप बोगांचतोर, मिमेटगुडा ओनसोंटा मनसु इसिं दान मीवा विसेलेसीं वाळकुंदु. बारित्ते, ओर अय्ते तकलिप बोगांचतोर, ओर पापमतुन होळसींतोर.

2 ओर वायाना रोजकुने मेंदुल्ता इच्छाना परकारम आयो गानि पेनदा इच्छा परकारम पिस्संतोर.

3 मोदाला मिमेट यहुदि आयवोरा इच्छाना परकारम बोगमतनम कियमळ, जोसते मनमळ, कल्लु उनमळ, पार्ति कियमळ, रिम्मा आयमळ, नियमकु विरोदमते ताकमळ, बतक ओज्जुवा बोम्मन मोळ्कमळ इल्हा कियिंदिर, इद वेल्लेने आता.

4 इंदके मिमेट असोंटा पेद्दा बोगमतनाल्कुने ओरतोनि कलियसेके हिल्लिर इंचि ओर इचंनम आसेक मंतुर. अदुनहाटीं ओर मीकुन बदनाम कीसंतुर.

5 गानि हातोरा, पिस्तोरा न्यायम कियालय तयार मनना पेनदुक ओरा पिस्वरता लेक्का हियापीता.

6 मेंदुल्ले मत्तास्के न्यायम मनकालोरा इच्चातुन पीसि आयिनागानि, आत्मा मात्रम पेनदा इच्चा परकारम पिस्साना इंचि बोर अय्ते हासि मत्तुर, ओर्कगुडा बेसता कबुर वेहमळ जर्गता.

7 इंदके दुनियाते मनना अन्निटवुना आकिर रोजकु दग्गेरा एवतां. अदुनहाटीं मिमेट पारतना कियानेंके बेस विचारमते, तेल्विते मंट.

8 अन्निकन्ना पेद्दा पोल्ले बतल इत्ते, वरोंक-वरोर एक्को पावरम कीम्दु, अल्हा कीते वेल्लेने पापालकुन मापि किया परकिर.

9 बतले गुल्गाकोंटा वरोंक-वरोर हेडमितोरलेसीं बेस हळकुंदु.

10 अंतोर्क वें-वें वरम दोर्कता, अदुनहाटीं वरोंक-वरोर सेवा कियालय पेनदा तीरतीराता कुर्पा दोर्कता बेसता दिवांजिनलेसीं अदुन वाळकुंदु.

11 बोन्क अय्ते पेनदा पोल्ले वेहाना वरम दोर्कता, ओर पेन वेहतापे वळ्ळकना. बोर अय्ते सेवा कीतोर, ओर पेन हिय्यना बलमतेने कियाना. अन्नि पोल्लेने येसु किरिस्तुनाहेंदाल पेनदुके महिमा दोर्काना. महिमा आनि ताकत युगा-युगाल्कुनदाका पेनदादे आंद. आमीन.

12-13 नावा पावरमगल्लोरिता! मीवा परिक्षा कियानाहाटीं मीवापोरों तळमितसोंटा तकलिपकु वांतां, अस्के मिमेट “बस्केने जर्गवद जर्गना मंता” इंचि, परेसान आयमदु. गानि मोमोटगुडा किरिस्तुना दुक्कमते पोत्तु आतोम इंचि कुसिते मंट. किरिस्तु मल्लिस वासि ओना पेद्दातनमतुन हुपिस्तस्के मिमेट वेल्ले कूस आकिट.

14 मीकुन ओक्कला बोरन्ना किरिस्तुना पोरोलताहेंदाल अपमानम कीते, मिमेट आसिर्वाद दोर्कतोरे आंदिर. बारित्ते पेनदा महिमाता आत्मा मीपोरों मंता.

15 गानि मीवा लोप्पोटोर बोरे आयिर, हक्कताहेंका, दोंगातनम कीताहेंका, तप्पुड कबळ कीताहेंका, वेंरेतोरा कबळते कय वाटताहेंका दुक्कम बोगांचा मन्नि.

16 ओक्कला मीलोप्पो बोरन्ना किरिस्तुनोर आताहाटीं तकलिपकु बोगांचनय्ते, ओर सिग्गु अर्नानायो, गानि किरिस्तुना पोरोल दोर्कताहाटीं पेनदुक महिमा हियागोम.

17 बारित्ते न्यायम कियाना वेला एवता. पेन मनातोने न्यायम सुख कीता अय्ते, बोर अय्ते पेनदा बेसता कबुरतुन केंजुर ओरा गति बतल आयार?

18 ओक्कला नीतिमंतुके मुक्ति दोर्कुळ कस्टम आयानय्ते, दुस्टुल्क आनि पापिल्कुनद बतल आयार?

19 अदुनहाटीं बोर अये पेनदा इच्चा मत्ताप तकलिप अरसेक मंतुरो, ओर बेसता कबाहक कीसेके, मनाकुन पुटिस्ता विस्वासमल्ला पेनदुक ओरा आत्मानु अप्पजेप्पना.

5

पेनदा मंदा

1 मीलोप्पो बोर अये पेद्दाल्क मंतुर, ओरालेसीगे ननागुडा पेद्दा मनकन, किरिस्तु बोगांचता तकलिपकुना गवाइतोन, ओर मल्सि वायानस्के ओना पेद्दातनमते कलियानोन आंदुन इंचि, नना आ पेद्दाल्कुंक वेहासेक मंतन.

2 मीवा जिम्मेदारिते मत्ता पेनदा मंदातुन पोस कीम्टु. इद कबळ बलमिते आयो गानि पेनदा इच्चा परकारम कुसिते कीम्टु, दोंगा कमाइताहाटीं आयो गानि मनसुनाल कीम्टु.

3 मीकु अप्पजेपता मंदापोर्रो अदिकारम हप्साकोंटा, ओरा मुन्ने उंदि उदाहरनलेसीं मंटु.

4 इल्हा मत्तिर इत्ते अंटोर्कुंकन्ना पेद्दा कोहानोर किरिस्तु वायानुर अस्के, बस्केने कळियसि होनवसोंटा पेद्दातनमता किरिटम मीकु दोर्कार.

5 अल्हेने ए लेय्युरिता! मिमेटगुडा पेद्दाल्क वेहताप ताकट, वरोंक-वरोर सेवा कियानाहाटीं सिन्नागासि मुन्ने ताकट. बारित्ते, पेन गर्रा कियानोर्कुंक अड्डम तिरियंता,

गानि सादा-सिंपल मंचि ताकानोर्कुंक कुर्पा हीता.☆

6 पेन मीकुन इनकुत्ता वेला वातारिते पेद्दा कियाना इंचि मिमेट दाना बलमगल्ला कयदा हिळु सिन्नागासि मंटु.

7 पेन मीवा रंदि कीता, अदुनहाटीं मीवा अन्नि रंदि अदुनपोर्रेन होळसीम्टु.

8 मीवा पगातद पेद्दा देय्यम बोन तिनकन इंचि सिंहमतालेसीं वरगेयसेके नालुं मूलां तिरियसेक मंता, अदुनहाटीं हुसारते, तेल्विते मंटु.

9 मिमेट विस्वासमते गट्टिगा मंचि, दान्क विरोद कीम्टु. दुनियाते मनानोर विस्वासल्कगुडा इल्हेने तकलिप बोगांचेके मंतुर इद मीक एरपाटे मंता.

10 अग्नि तीरकुना कुर्पा कियाना पेन मीकुन किरिस्तुना लोप्पो दाना बस्केळक मनना पेद्दातनमहाटीं केयता. मिमेट कोन्नि रोजकु तकलिपकु बोगांचतंका अदे पेन मीकुन दानलायक कीता, मीकु बलम हीसि निलाहंता.

11 दानादे राज्येम युगा-युगाल्कुनदाका मन्निकांटी, आमीन.

आकिरता जोहार

12 विस्वासमगल्ला तम्मुर इंचि नना नम्मुता सिल्वानुसना कय्दे इद सिन्ना सिट्टि रासतन. इदे पेनदा निजम कुर्पा आंदु, इव्ते मिमेट गट्टिगा निल्सि मंटु, इंचि नना मीकु इद सिट्टिते रासि तेळियागोट्टिस वेहासेक मंतन.

13 मीवा लेसीगे बेबिलोनते पेन पेरता लोकल्क मंतुर, ओर मीक जोहार वेहासेक मंतुर. नावा मरिनसंतोर मरकुसगुडा मीक जोहार वेहासेक मंतोर.

14 मिमेट वरोंक-वरोर कय कल्पिसि पवित्र पावरमते जोहार कीम्पु. बोर अय्ते किरिस्तुने मंतुर मी अंतोर्क सांति दोर्कि.*

* 5:14 ग्रीक बासाते बुरमळ इंचि रासि मंता.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068